

## A R G A T H E L I A,

five

## A R G I L E.

**V**Ltra lacum Lomundum & Lennox partem Occiduam se expandit juxta *Cluidæ* æstuarium *Argathelia*, quæ & *Argadia* Latine, vulgo *Argile*, rectius *Argathel*, & *Argithil*, id est, *Iuxta Hibernicos*, vel, ut veteres schidæ habent, *Margo Hibernia*. Hiberniæ enim adjacet, cujus incolæ *Gwithil* & *Gaothel* appellant Britanni. Regio longe lateque procurrit piscosis lacubus lacinata, & montibus ad armenta pascendis alibi percommoda, in quibus feræ vaccæ & cervi vagantur; ad litus autem scopulis & nigricantium montium sterilitate horrescit. Hac in parte, ut author est Beda, *Britannia post Britones & Pictos tertiam Scotorum nationem in Pictorum parte recepit. Qui duce Reuda de Hibernia egressi, vel amicitia vel ferro sibi met inter eos sedes, quas hæcenus habent, vindicarunt. A quo videlicet duce usque hodie Dalreudini vocantur: nam lingua eorum Dal partem significet. Et paulo post: Hibernia propria Scotorum patria, ab hac egressi tertiam in Britannia Britonibus, & Pictis gentem addiderunt. Est autem sinus maris permaximus qui antiquitus gentem Britonum à Pictis sece- nebat. Qui ab Occidente in terras longo spatio irrupit, ubi est civitas Britonum munitissima usque hodie, quæ vocatur Alcluith. Ad cujus videlicet sinus partem Septentrionalem Scoti (quos diximus) advenientes sibi locum patriæ fecerunt. Nominis illius Dalreudini vestigia jam supersunt, quod scio, plane nulla, nec apud authores quidem, nisi eadem sit cum Dalrieta. In vetusto enim libello de divisione Albanie legimus de Kinnadio, quem Scotorum Regem fuisse constat, & Pictos debellasse, hæc ipsissima verba, Kinnadius biennio antequam pervenit in Pictariam (sic Pictorum regionem vocat) Dalrieta regnum suscepit. Dalreæ etiam alibi hoc tractu in recentiori memoratur historia, ubi infeliciter Rex Robertus Brus pugnavit.*

**U**t huic provinciæ jus per *Iusticiarios Itinerantes*, Perthi administraretur, quando Regi visum fuerit, sanxit R. Iacobus IV Ordinum regni autoritate. Sed ipsi Comites sua in quibusdam jura habent Regalia, viri amplissima autoritate & numerosa clientela, qui ab antiquis *Argathelia* Regulis per innumeros proavos genus deducunt, & à *Cambello* ipsorum castro cognomen acceperunt; Comitisque honorem & titulum Regi Iacobo Secundo acceptum ferunt, qui (ut proditum est) Colinum Dominum *Cambell* *Argathelia* Comitem propter virtutem & familiæ dignitatem investivit. Cujus posterii propitia Regum gratia jam aliquandiu fuerunt *Iustitii* Regni *Scotia*

Dalreudini.  
Dal.

Dalrieta.

Dalreæ.

Comites  
Argile.

generales (sive ut illi loquuntur) *Iustitii* generaliter constituti, & *Aulæ Regiæ* Præfecti.

[Archibaldus circa 1630 renunciavit juri *Iustitii* generalis, ob quam causam Rex ei concessit jurisdictionem Insularum *Argathelia*, *Hebridum*, &c. In postremo Regis adventu circa 1640 creatus est Marchio de *Argyl*.]

ADDIT.

Hoc peculiare habent Marchiones de *Argyl*, jam ab antiquo & longo tempore, ut quando filias elocant, amici & clientes illorum dotem persolvere tenentur, & propter id conveniuntur & taxantur secundum quantitatem equorum & boum. Legitur in *Cragii* feudis, Dominum de *Argyl* concessisse clienti suo Constantino *Walkenshaw* quasdam terras, ut paratus esset quando vocaretur, machinas majores tempore belli explodere.]

## P E R T H I A,

## PERTH SHIRIFDOME.

**E** Gremio montium *Albanie* *Taus* fl. totius *Scotia* maximus se fundit, primumque per agros proruit, donec in lacum diffusus satis infusum cursum cohibet. Inde ripis coarctatus *Perthiam* regionem amplam & fecunde opimam irrigans, *Amund* rivulum ex *Atholia* proludentem suscipit.

Taus fl.

Hæc *Atholia* (ut de via paulo deflectam) maleficus mulieribus infamis, regio satis fertilis saltuosas habet convalles, ubi *SYLVA CALEDONIA* variis anfractibus umbrarum horrore, urforum, nec non immanium taurorum jubatorum, quos modo memoravi, latibulis formidolosa, olim longe lateque per regiones circumquaque se explicuit. Locorum hic gloria parva, sed Comitum sane memoria insignis. Thomas filius *Rollandi* de *Gallovidiæ* junior jure uxorio fuit Comes *Atholia*, cujus filius *Patricius* à *Bissetis* æmulis *Haddingtonia* occisus in cubiculo, ædibus in quibus egit mox incensus, ut fortuito incendio periisse videretur. Comitatu autem successit *David* de *Hastings*, qui *Patricij* duxerat materteram, cujus filius *David* ille de *Strathbogy* dictus videatur, qui paulo post, regnante apud Anglos *Henrico* Tertio, *Atholia* Comes duxit alteram filiam & hæredem *Richardi* filii nothi *Ioannis* Regis *Angliæ* cum longe lautissima in *Angliæ* hæreditate, quæ illi enixa duos filios *Ioannem* Comitem *Atholia*, qui fluxa fide sublimi suspendio, patibulo scilicet quinquaginta pedum alto, periit, & *Davidem* Comitem *Atholia*, cui ex nuptiis cum altera filia & hærede *Ioannis* *Comitum* de *Badzenoth*, ex una hæredum *Audomari* de *Valentia* *Comitis* *Penbrochiæ* magnæ obtigerunt possessiones. Illi natus *David*, qui inter *Angliæ* Comites ad *Comitia* *Angliæ* *Parlamentaria* sub *Edwardo* Secundo subinde evocatus, & factus *Locum tenens* *Scotia* sub *R. Edw. Balliolo* ceci-

Atholia.

Sylva Caledonia.

Comites  
Atholia.Chronicon  
Maitress.